



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, sudija Velimir Ninković i sutkinja Sanela Gorušanović - Butigan, potpredsjednici Vijeća, te sudija Sedin Idrizović, sudija Obren Bužanin, sutkinja Aleksandra Obradović, tužiteljica Bojana Jolović, tužiteljica Željka Fabić, tužilac Saša Sarajlić, prof. dr. Džamna Vranić, advokat dr. sc Davor Martinović, advokatica Duška Bogojević i advokatica Elma Veledar Arifagić, na sjednici održanoj 11. i 12.02.2026. godine, donijelo je

RJEŠENJE o imenovanju sudije u Okružni sud u Bijeljini

- I. Za sudiju Okružnog suda u Bijeljini imenuje se **Marković Bojana**.
- II. Datum stupanja na dužnost imenovane Vijeće će odrediti posebnom odlukom.

O b r a z l o ž e n j e

Visoko sudsko i tužilačko vijeće Bosne i Hercegovine je na sjednici održanoj 18. i 19.06.2025. godine donijelo odluku da se konkurs ponovi za jednu (1) poziciju sudije Okružnog suda u Bijeljini – krivični referat oglašenu konkursom broj 04-07-3-4035-1/2024 od 07.11.2024. godine s obzirom da na rang listi nije bilo kandidata odgovarajuće nacionalne pripadnosti.

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 10.10.2025 godine objavilo javni konkurs pod brojem: 04-07-3-3249/2025, kojim je ponovo oglašena jedna (1) pozicija sudije Okružnog suda u Bijeljini – krivični referat.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4), a u vezi sa članom 60. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata, na kojoj se nalazio jedan kandidat, sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da na oglašenu poziciju sudije Okružnog suda u Bijeljini imenuje prvorangiranu kandidatkinju Marković Bojanu, iz reda srpskog naroda, koja od 14.03.2014. godine, obavlja dužnost tužioca Okružnog javnog tužilaštva u Trebinju. Prethodno tome, imenovana je od 2010. godine do 2014. godine, obavljala poslove stručnog saradnika u Tužilaštvu Bosne i Hercegovine, dok je od 2006. godine do 2008. godine obavljala poslove pripravnika u Okružnom sudu u Banja Luci.

Vijeće je, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kriteriji stručnosti i sposobnosti pravne analize imenovane kandidatkinje utvrđeni su na osnovu ocjene rada za posljednje tri godine za koje je ocijenjena. Za prethodne tri godine odnosno 2022, 2023 i 2024. godinu ocijenjen je ocjenama 5,4,5, što čini prosjek ocjena 4,7. Prema odredbama člana 56. stav 2. Poslovnika VSTV-a BiH, prosječnoj ocjeni rada za prethodne tri godine dodijeljeno je 96 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 13,1 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Imenovana kandidatkinja je u toku konkursne procedure, za kriterij stručnosti i sposobnosti pravne analize ostvarila 96 boda od mogućih 100 bodova, dok je na razgovoru pred nadležnom komisijom u pogledu drugih kriterija ostvarila 13,1 od mogućih 20 bodova, što ju je u konačnici rangiralo na prvo mjesto rang liste kandidata sa ostvarenih 109,1 od mogućih 120 bodova.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (1) tačka b) i 59b. st. (2) i (4) Poslovnika VSTV-a BiH stekla uslove za predlaganje i imenovanje na poziciju sudije okružnog suda, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedene kandidatkinje ocijenilo da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine.

Nacionalna struktura 12 sudija, prema popisu stanovništva iz 1991. godine, bi trebala biti: Bošnjaci (5,5), Hrvati (0,0), Srbi (5,9), Ostali (0,5). Trenutna nacionalna struktura 10 sudija: Bošnjaci (3), Hrvati (0), Srbi (7), Ostali (0).

Prema prethodno navedenoj nacionalnoj strukturi u Okružnom sudu u Bijeljini nedostaje kandidata iz reda bošnjačkog naroda (- 2,5), hrvatskog naroda (0,0), srpskog naroda (+1,1) i ostalih (- 0,5).

U vezi sa naprijed navedenim, Vijeće je cijenio činjenice da je konkurs za ovu poziciju ponovljen na sjednici održanoj 18. i 19.06.2025. godine iz razloga jer na rang listi nije bilo kandidata odgovarajuće nacionalne pripadnosti, kao i da se konkurs iz navedenog razloga može ponoviti samo jednom u skladu sa članom 62c. stav (2) Poslovnika VSTV BiH.

Nadalje, a imajući u vidu potrebe navedenog suda za sudijom sa iskustvom na krivičnom referatu, koja je utvrđena u skladu sa članom 34a. stav (3) Poslovnika VSTV-a BiH, Vijeće je vodilo računa i o radnom iskustvu kandidatkinje u određenoj oblasti prava, te je cijenio da imenovana kandidatkinja obavljajući dužnost javnog tužioca u Okružnom javnom tužilaštvu u Trebinju posjeduje traženo iskustvo na krivičnom referatu.

Imajući u vidu sve navedeno, Vijeće je primjenom kriterija iz člana 43. Zakona o VSTV-u BiH, a u vezi sa okolnostima iz člana 59b. stav (5) i člana 61. Poslovnika VSTV-a BiH ocijenio da je predložena kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata za imenovanje na poziciju sudije Okružnog suda u Bijeljini.

U pogledu dijela rješenja o stupanju na dužnost imenovanog, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog

JAVNO


i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24, 57/24 i 37/25), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-2-936-I/2026
Datum: 12.02.2026. godine



Predsjednik

Samir Bogunić

